

Universiti awam dapat autonomi

» Langkah pemerkasaan bolehkan IPT buat keputusan segera: Najib

Oleh Faridzwan Abdul Ghafar
faridzwan@bh.com.my

▀ Serdang

Kerajaan bersedia memberikan kuasa autonomi kepada semua universiti awam (UA) meliputi aspek berkaitan tadbir urus,

perjawatan dan pengurusan kewangan, kata Datuk Seri Najib Razak.

Perdana Menteri berkata, proses pemerkasaan institusi pendidikan tinggi (IPT) di negara ini membolehkan keputusan pada peringkat universiti dibuat pada kadar segera, namun menegaskan keputusan itu harus disertakan dengan rasa tanggungjawab.

Katanya, agenda pemerkasaan UA adalah sebahagian Pelan Transformasi Universiti (UniTP) yang dilengkapi dengan garis panduan amalan terbaik dan mampu memacu pembangunan negara.

Perlu disertai akauntabiliti
“Kita hendak mengukuhkan

universiti dengan memberi lebih kuasa dalam tadbir urus, kenaikan pangkat, mengadakan kerjasama francais dan lain-lain supaya keputusan dapat dibuat lebih cepat.

“Bagaimanapun, proses pemerkasaan yang diturunkan ke universiti ini mesti disekalikan dengan akauntabiliti,” katanya ketika menyampaikan ucapan pada majlis bersama warga pendidikan tinggi di Universiti Putra Malaysia (UPM) di sini, semalam.

Pada majlis itu, Perdana Menteri turut mengambil kesempatan beramah mesra dengan warga pendidikan tinggi dan mendapatkan pandangan mengenai sektor pendidikan tinggi negara.

Dana kewangan

Dalam pada itu, Najib juga meminta Lembaga Pengarah dan Naib Canselor Universiti supaya memikirkan kaedah memperoleh dana bagi tujuan melonjakkan keupayaan universiti ke tahap lebih tinggi.

Katanya, universiti memerlukan dana kewangan yang berterusan untuk membolehkan operasinya dan penyelidikan dapat dilaksanakan untuk jangka masa panjang.

“Dalam hal ini, kita minta tolong VC (Naib Canselor) fikirkan macam mana. Semuanya bijak pandai kerana berada di universiti dan sudah tentu mempunyai keupayaan intelektual.

“Justeru, gunakan keupayaan intelektual saudara untuk memikirkan cara bagaimana universiti boleh mendapatkan sumber kewangan,” katanya.

Najib turut mengulangi komitmen menjayakan Pelan Pembangunan Pendidikan Malaysia 2015-2025 (Pendidikan Tinggi), selaras hasrat kerajaan menjadikan Malaysia negara maju berpendapatan tinggi.